

- NACRT -

Na osnovu člana 13. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine" broj: 49/06, 51/09) i člana 26. Statuta Općine Stari Grad Sarajevo ("Službene novine Kantona Sarajevo", broj 20/24), na 4. redovnoj sjednici održanoj dana 27.02.2025. godine, Općinsko vijeće Stari Grad Sarajevo, donosi

**PRAVILNIK
O USLOVIMA I POSTUPKU DODJELE FINANSIJSKIH SREDSTAVA IZ BUDŽETA
OPĆINE STARI GRAD SARAJEVO ZA SUFINANSIRANJE POSTAVLJANJA
SOLARNIH SISTEMA ZA VLASTITE POTREBE NA STAMBENIM OBJEKTIMA
INDIVIDUALNOG STANOVANJA**

I – OPĆE ODREDBE

**Član 1.
(Predmet Pravilnika)**

Ovim Pravilnikom utvrđuju se uslovi i postupak dodjele finansijskih sredstava iz Budžeta Općine Stari Grad Sarajevo za sufinansiranje postavljanja solarnih sistema za vlastite potrebe na objektima individualnog stanovanja.

**Član 2.
(Omjer sufinansiranja postavljanja solarnih sistema na stambenim objektima individualnog stanovanja)**

- (1) Općina Stari Grad Sarajevo sufinansira radove postavljanja solarnih sistema u omjeru 50% od ukupno procjenjenih troškova navedenih radova.
- (2) Općina Stari Grad Saajevo sufinansira troškove izrade projektno-tehničke dokumentacije u omjeru 50% od ukupnih troškova za izradu navedene dokumentacije.

II – USLOVI ZA DODJELU FINANSIJSKIH SREDSTAVA SUFINANSIRANJE POSTAVLJANJA SOLARNIH SISTEMA A NA OBJEKTIMA INDIVIDUALNOG STANOVANJA

Član 3.

(Uslovi za dodjelu finansijskih sredstava za sufinansiranje postavljanja solarnih sistema na objektima individualnog stanovanja)

Uslovi shodno odredbama ovog Pravilnika, koji moraju biti ispunjeni da bi se dodjelila finansijska sredstva za sufinansiranje postavljanja solarnih sistema na objektima individualnog stanovanja:

- da je aplikant vlasnik ili suvlasnik objekta na koji se planira postavljanje solarnih sistema;
- da ukoliko je aplikant suvlasnik objekta na koji se planira postavljanje solarnih sistema za prijavu osigura notarski obrađenu saglasnost suvlasnika objekta;
- da je objekat na koji se planira postavljanje solarnih sistema legalan, odnosno da je u zemljišnim knjigama i katastarskom operatu zabilježen u gabaritima koji odgovaraju stanju na terenu;
- da je objekat na koji se planira postavljanje solarnih sistema objekat individualnog stanovanja u kojem aplikant trajno boravi;
- da je objekat na koji se planira postavljanje solarnih sistema na području Općine Stari Grad Sarajevo;
- da je aplikant prijavljen na području Općine Stari Grad Sarajevo najmanje šest mjeseci računajući do dana objave javnog poziva.

III – JAVNI POZIV ZA DODJELU FINANSIJSKIH SREDSTAVA ZA SUFINANSIRANJE POSTAVLJANJA SOLARNIH SISTEMA NA OBJEKTIMA INDIVIDUALNOG STANOVANJA

Član 4.

(Javni poziv)

- (1) Finansijska sredstva iz Budžeta Općine za sufinansiranje postavljanja solarnih sistema na objektima individualnog stanovanja dodjeljuju se isključivo putem Javnog poziva, koji raspisuje Općinski načelnik nakon usvajanja Budžeta za tekuću godinu i donošenja Odluke o raspisivanju Javnog poziva.
- (2) Odlukom iz stava (1) ovog člana se pokreće postupak dodjele finansijskih sredstava za sufinansiranje postavljanja solarnih sistema na objektima individualnog stanovanja, kojom se utvrđuje ukupan iznos sredstava planiran u navedenu svrhu za tekuću godinu, te koja sadrži i druge podatke u skladu sa Smjernicama o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije Bosne i Hercegovine“ broj: 37/24).
- (3) Javni poziv iz stava (1) ovog člana ostaje otvoren do 15.12. tekuće godine.

- (4) Javni poziv se objavljuje u jednom dnevnom listu ili na web stranici Općine Stari Grad Sarajevo.
- (5) Odluku i Javni poziv iz stava (1) ovog člana priprema i dostavlja Općinskom načelniku Služba za poslove mjesnih zajednica.

Član 5. **(Sadržaj Javnog poziva)**

- (1) Javni poziv obavezno sadrži:
 - Naziv organa koji raspisuje poziv;
 - Spisak dokumentacije koja se obavezno dostavlja uz prijavu;
 - Naznaku da se Javnim pozivom sufinansiraju troškovi radova postavljanja solarnih sistema na stambenim objektima individualnog stanovanja;
 - Naznaku da se Javnim pozivom sufinansiraju troškovi izrade projektno tehničke dokumentacije koja je obavezna dokumentacija uz prijavu, ukoliko Komisija ocjeni da je prijava potpuna, te ukoliko se donese odluka o izboru aplikanta za dodjelu finansijskih sredstava za sufinansiranje solarnih sistema na stambenim objektima individualnog stanovanja;
 - Aplikaciju za prijavu na Javni poziv;
 - Rok za prijavu na Javni poziv;
 - Iznos finansijskih sredstava, planiran u Budžetu za sufinansiranje postavljanja solarnih sistema na objektima individualnog stanovanja po Javnom pozivu;
 - Vremenski period za koji se Javni poziv raspisuje;
 - Informacije o načinu komunikacije tokom trajanja Javnog poziva (kontakt osoba, kontakt podaci, način zahtjevanja dodatnih informacija i sl);
 - Druge podatke shodno Smjernicama o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije Bosne i Hercegovine“ broj: 37/24);
- (2) Sastavni dio Javnog poziva je aplikacija za prijavu na isti.

Član 6. **(Dokumentacija za prijavu na Javni poziv)**

Uz popunjenu aplikaciju, koja je sastavni dio Javnog poziva, za prijavu na isti, aplikant je obavezan dostaviti sljedeću dokumentaciju:

- Zemljišno-knjižni izvadak ne stariji od šest mjeseci za objekat na koji se planira postavljanje solarnih sistema;
- Kopiju katstarskog plana ne stariju od šest mjeseci za objekat na koji se planira postavljanje solarnih sistema;
- Notarski ovjerenu saglasnost suvlasnika za apliciranje na javni poziv – u slučaju da je predmetni stambeni objekat u suvlasništvu;

- Dokaz o prebivalištu na adresi na kojoj je objekat na koji se planira postavljanje solarnih sistema;
- Elektroenergetsku saglasnost za objekat na koji se planira postavljanje solarnih sistema;
- Projektno-tehničku dokumentaciju za postavljanje solarnih sistema;
- Akt nadležne službe za urbanizam da su projektno-tehničkom dokumentacijom koja se prilaže uz prijavu predloženi zahvati u prostoru iz člana 69. Zakona o prostornom uređenju Kantona Sarajevo („Službene novine Kantona Sarajevo“ broj: 24/17 i 1/18), a za objekte koje su u obuhvatu nacionalnog spomenika odgovarajuće odobrenje nadležnog organa;
- Izjavu kojom aplikant prihvata uslove učešća na Javnom pozivu, te da je saglasan sa istim;
- Izjavu kojom se aplikant obavezuje da će sufinansirati postavljanje solarnih sistema na stambenim objektima individualnog stanovanja;
- Kućnu listu;
- Račune za električnu energiju u posljednjih dvanaest mjeseci iz kojih će biti vidljiva godišnja potrošnja električne energije za predmetni objekat.

IV –KOMISIJA ZA POSTUPANJE PO APLIKACIJAMA NA JAVNI POZIV

Član 7. (Komisija)

- (1) Općinski načelnik prije raspisivanja Javnog poziva iz člana 5. ovog Pravilnika, imenuje Komisiju za postupanje po aplikacijama na Javni poziv za dodjelu finansijskih sredstava iz Budžeta Općine za sufinansiranje postavljanja solarnih sistema na stambenim objektima individualnog stanovanja (u daljem tekstu: Komisija).
- (2) Komisija se imenuje na period od 12 (dvanaest) mjeseci i broji 3 (tri) člana, od kojih je jedan predsjednik Komisije, a čine je državni službenici i namještenici Općine Stari Grad Sarajevo.
- (3) Komisija ima zadatak da u roku od tri dana od prijema prijave po istoj postupi, tako da:
 - Pregleda aplikaciju sa dostavljenom dokumentacijom;
 - Službi za poslove mjesnih zajednica dostavlja infomaciju o aplikacijama uz koje nije dostavljena obavezna dokumentacija iz člana 6. ovog Pravilnika, te odbacuje kao da nisu ni podnesene, a o čemu aplikanta pismenim putem obavještava Služba za poslove mjesnih zajednica;
 - Aplikacije koje ispunjavaju kriterije utvrđene ovim Pravilnikom dostavlja Općinskom načelniku na dalje postupanje uz preporuku da li da odobri dodjeljivanje sredstava za sufinansiranje postavljanja solarnih sistema na stambenim objektima individualnog stanovanja.
- (4) Prilikom sačinjavanja preporuke, Komisija će bodovati dodatno sljedeće kriterije, shodno Uputstvu za aplikante koje je sastavni dio Javnog poziva, i to:
 - Kvadraturu stambenog objekta na koji se planira postavljanje solarnih sistema;
 - Broj članova domaćinstva;
 - Godišnju potrošnju električne energije.

V – ODLUKA O DODJELI FINANSIJSKIH SREDSTAVA ZA DODJELU FINANSIJSKIH SREDSTAVA ZA SUFINANSIRANJE POSTAVLJANJA SOLARNIH SISTEMA ZA VLASTITE POTREBE NA STAMBENIM OBJEKTIMA INDIVIDUALNOG STANOVANJA

Član 8.

(Odluka o dodjeli finansijskih sredstava)

Općinski načelnik na osnovu preporuke Komisije iz člana 7. ovog Pravilnika donosi Odluku kojom odobrava dodjelu finansijskih sredstava za sufinansiranje postavljanja solarnih sistema na stambenim objektima individualnog stanovanja.

Član 9.

(Ugovor sa korisnicima finansijskih sredstava)

(1) Općinski načelnik po osnovu Odluke iz člana 8. ovog Pravilnika, zaključuje ugovor o dodjeli finansijskih sredstava za **sufinansiranje postavljanja solarnih sistema na stambenim objektima individualnog stanovanja**.

(2) Za dodijeljena sredstva po osnovu Ugovora iz stava (1) ovog člana obavezno je pravdanje najkasnije u roku od 6 (šest) mjeseci od dana potpisivanja istog.

(3) Ukoliko se ne opravdaju sredstva na način da su ista utrošena u svrhu za koju je zaključen ugovor iz stava (1) ovog člana, podnosilac zahtjeva je obavezan finansijska sredstva vratiti u roku 30 (trideset) dana, u protivnom će se pokrenuti postupak pred nadležnim sudom putem Pravobranilaštva Općine Stari Grad Sarajevo, a isti neće imati pravo na dodjelu sredstava iz Budžeta Općine narednih 5 (pet) godina shodno odredbama ovog Pravilnika.

(4) Ugovor iz stava (1) ovog člana priprema Služba za poslove mjesnih zajednica Općine Stari Grad Sarajevo.

VI – PRAĆENJE REALIZACIJE UTROŠKA SREDSTAVA

Član 10.

(Praćenje dodijeljenih finansijskih sredstava)

(1) Općinski načelnik posebnim rješenjem formira Komisiju za praćenje realizacije i utroška dodijeljenih sredstava za tekuću godinu po osnovu svih javnih poziva po kojima se dodjeljuju sredstva iz Budžeta Općine Stari Grad Sarajevo, a koja prati i utrošak i pravdanje finansijskih sredstava dodijeljenih po osnovu člana 8. ovog Pravilnika.

(2) Komisija iz stava (1) ovog člana dostavlja izvještaj Općinskom načelniku svakih 6 (šest) mjeseci o praćenju pravljanja finansijskih sredstava dodijeljenih po osnovu člana 8. ovog Pravilnika.

(3) Komisija iz stava (1) ovog člana dostavlja izvještaj Općinskom vijeću u januaru za prethodnu godinu, u kojem će biti detaljno navedeni rezultati praćenja pravljanja finansijskih sredstava dodijeljenih po osnovu odredaba ovog Pravilnika.

VII - PRELAZNE I ZAVRŠNE ODREDBE

Član 11. **(Stupanje na snagu Pravilnika)**

Ovaj Pravilnik stupa na snagu osmog dana od dana objavljivanja u “Službenim novinama Kantona Sarajevo”.

Broj: _____/25

Datum: 27.02.2025. godine

PREDSJEDAVAJUĆI
OPĆINSKOG VIJEĆA STARI GRAD
SARAJEVO

Seid Škaljić

OBRAZLOŽENJE

I - PRAVNI OSNOV

Pravni osnov donošenja ovog Pravilnika sadržan je u odredbama člana 13. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine" broj: 49/06, 51/09), kojima su utvrđene nadležnosti Općinskog vijeća, dok je članom 26. Statuta Općine Stari Grad Sarajevo ("Službene novine Kantona Sarajevo", broj 20/24) utvrđeno da je za donošenje propisa i akata u okviru prava i dužnosti Općine nadležno Općinsko vijeće.

II - RAZLOZI DONOŠENJA

Cijeneneći svakodnevne potrebe stanovništva na području Općine Stari Grad Sarajevo, ali i prateći projekte koji su u skladu sa smjernicama Europske unije, te u cilju zaštite životne sredine, predložen je nacrt Pravilnika o uslovima i postupku dodjele finansijskih sredstava iz Budžeta Općine Stari Grad Sarajevo za sufinansiranje postavljanja solarnih sistema za vlastite potrebe na objektima individualnog stanovanja.

Cilj ovog Pravilnika je da se postigne:

- smanjenje troškova za električnu energiju proizvodnjom električne energije u vlastitim fotonaponskim sistemima,
- povećanje otpornosti na promjene cijena električne energije,
- povećanje korištenja obnovljivih izvora energije i
- smanjenje emisija čvrstih čestica i gasova s efektom staklene bašte (GHG).

Cijeneći naprijed navedeno, kao i relevantne zakonske i podzakonske akte, predložen je ovaj Nacrt.

III – OBRAZLOŽENJE

Odlukom je predviđeno sedam poglavlja, na način kako slijedi:

I – OPĆE ODREDBE;

II – USLOVI ZA DODJELU FINANSIJSKIH SREDSTAVA SUFINANSIRANJE POSTAVLJANJA SOLARNIH SISTEMA A NA OBJEKTIMA INDIVIDUALNOG STANOVANJA;

III – JAVNI POZIV ZA DODJELU FINANSIJSKIH SREDSTAVA ZA SUFINANSIRANJE POSTAVLJANJA SOLARNIH SISTEMA NA OBJEKTIMA INDIVIDUALNOG STANOVANJA;

IV – KOMISIJA ZA POSTUPANJE PO APLIKACIJAMA NA JAVNI POZIV;

V – ODLUKA O DODJELI FINANSIJSKIH SREDSTAVA ZA DODJELU FINANSIJSKIH SREDSTAVA ZA SUFINANSIRANJE POSTAVLJANJA SOLARNIH SISTEMA ZA VLASTITE POTREBE NA STAMBENIM OBJEKTIMA INDIVIDUALNOG STANOVANJA;

VI – PRAĆENJE REALIZACIJE UTROŠKA SREDSTAVA;

VII - PRELAZNE I ZAVRŠNE ODREDBE.

IV - FINANSIJSKA SREDSTVA

Za provođenje procedure usvajanja ovog Pravilnika nisu potrebna finansijska sredstva dok su za realizaciju iste potrebna finansijska sredstva koja je potrebno predvidjeti u Budžetu Općine.

Predlagač
Općinski načelnik putem
Službe za poslove mjesnih zajednica Općinskog načelnika